

- sensibus animo coërcitis sese accingit, o Arjuna! ad opus corporali ministerio peragendum, sine ambitione, is magni aestimatur. Tu perage opus necessarium; opus praestantius est otio: ne corporis quidem sustentatio tibi otioso procedat. Praeter opera sacrorum caussa suscepta mundus hic operum vinculis implicatur; quapropter, Kuntidis nate, ambitionis immunis opus aggredere. Simul cum ritu sacrifico progenie humana creata olim dixit Progenitor: »Illo propagabimini; ille vobis esto vacca abundantiae. Divos colite illo; hi Divi vos colunt. Mutuo vos colentes, salutem summam adipiscemini. Optatos cibos vobis DI dabunt, sacrificiis culti; cibis ab his datis, non ante parte iisdem oblata, qui fruitur, is sane fur est. Sacrificiorum reliquias comedentes probi exsolvuntur omnibus peccatis, vescuntur autem piaculo noxii, qui dapes instruunt sui gratia.« Frugibus aluntur animantia, imbre fit frugum proventus, sacrificio impetratur imber, sacrificium opere consummatur, opus e numine ortum scias, numen e simplici et individuo ortum. Ideo numen omnia permeans semper in sacrificio praesens est. Hunc orbem sic circumactum quicumque volvendo haud promovet in hoc seculo, is incesto aevo transacto, sensibus indulgens, o Prithae fili! frustra vivit. Qui autem secum quietus est homo, ac sibimet satisfaciens, contentusque semet ipso, is omni negotio vacat; et huius quidem nihil interest, utrum aliquid factum sit an infectum, neque eum ex omnibus animantibus commodi ullius expectatio suspendit. Quare sine ambitione semper opus tibi demandatum appara: sine ambitione enim opus apparans summum bonum vir adipiscitur. Operibus certe perfectionem quaesivere Janakas ceterique eiusdem ordinis. Generis humani adsen-